

Ang Tindahang Bigay Pag-asa ng Rizal, Nueva Ecija



“Nung wala po yung Pantawid, ang masasabi ko po sa sarili ko nun ay hindi ko kayang pag-aralin ang mga anak ko pero nung dumating ang Pantawid, naitaguyod ko naman po. . .mas gumanda naman po ang buhay namin” wika ni Domenia Ubaldo, 43.

“Malaki po ang naitulong sa akin ng 4Ps kasi mas natutukan ko ngayon ang mga anak ko. . .na-encourage ko silang mag-aral” bahagi naman ni Iris Joy Mauyao, 30.

Si Domenia at Iris Joy ay parehong naninirahan sa bayan ng Rizal at kapwa Pantawid Pamilyang Pilipino Program o 4Ps beneficiary at miyembro nang Sustainable Livelihood Program (SLP) Association na may pangalang “Tindahang Bigay Pag-asa”. Isa ngayo’y kilalang grocery store na s’ya na ring nagsisilbing supplier ng bigas sa mga benepisyaryo ng 4Ps ng naturang bayan, alinsunod sa bagong alituntunin ng programa, kung saan ang bawat benepisyaryo ng 4Ps ay makakatanggap ng Php600.00 kada buwan o may kabuuang Php7,200.00 sa loob ng isang buong taon, bilang additional rice assistance.

Si Nanay Domenia ang secretary ng naturang asosasyon samantalang si Nanay Iris Joy naman ang treasurer. ayon sa kanila, noong nakaraang Marso, unang payout ng karagdagang grant sa rice subsidy (para sa Buwan ng Enero), ay kumita ang kanilang Php31,000.00, samantalang ng sumunod na payout naman, noong buwan ng Mayo (para sa Buwan ng Pebrero at Marso), sila nama’y kumita ng Php67,900.00. Sa pakikipagtulungan na rin ng mga masisigasig na Municipal Links at Project Development Officer II ng naturang bayan, ay sila na rin ang nagsu-supply ng feeds para sa Hog Fattening Project ng SLP, kung saan sila naman ay kumikita ng Php35,000.00.

Malaking pagbabago ang dala ng “Tindahang Bigay Paga-asa” sa mga kasapi nito, tulad ni Nanay Domenia at Iris Joy. Si Nanay Domenia ay may tatlong anak, ang kanyang asawa ay isang magsasaka. Ayon na rin sa kanya, hindi sapat ang kinikita ng kanyang asawa sa pagsasaka kaya siya rin ay namasukan bilang labandera at kumikita ng 150 kada-araw. Sa kabila nang kahirapan ay patuloy na nagsikap at nagt’yaga si Domenia upang maitaguyod ang pag-aaral ng kanyang mga anak. Subalit, sa kabila nang pagpapagal, alam na ni Domenia na siya ay walang kakayahang magpaaral ng kaniyang anak sa kolehiyo dahil sa bigat ng gastusin nito. “Hindi ko sila kayang bilhan ng sapatos, di ko sila kayang bilhan ng bag, umaasa lang po ako sa bigay ng Ate ko, o kung sinong kamag-anak ang meron. . . sabi ko sa panganay ko hindi ko siya kayang pag-aralin ng college,” kwento niya. Ngunit, sa pagdating ng 4Ps at “Tindahang Bigay Pag-asa” ay unti-unting bumuti ang kanilang estado. Ngayon, ang panganay na anak ni Domenia ay kasalukuyang nasa ikatlong antas na sa kolehiyo at kumukuha ng kursong Bachelor of Science in Education.

Si Iris Joy naman ay may dalawang anak at tricycle driver naman ang kanyang asawa. Siya ay may maliit na tindahan na gaya rin ni Domenia, ay naghahanap buhay upang may pandagdag kita sa kanilang pamilya. Noon ay hindi gaanong natututukan ni Iris Joy ang kaniyang mga anak sa pag-aaral dala ng kaabalahan sa paghahanap-buhay. Ngunit sa tulong rin ng “Tindahang Bigay Pag-asa” ay unti-unting bumuti ang kaniyang relasyon sa kanyang mga anak at mas nadagdagan pa ang kita nito. Siya ay mas nagkaroon na ng panahon para sa kanyang dalawang anak na nag-aaral. Ang kanyang panganay na anak ay kasalukuyang nasa Grade 7, samantalang ang bunso naman ay nasa Grade 2.

Ang “Tindahang Bigay Pag-asa” ay isang grocery store association na may tatlumpung miyembro; isang association sa ilalim ng SLP, isa sa mga programa ng DSWD na naglalayong magbigay hanapbuhay sa mga mahihirap na pamilyang pilipino upang sila ay mas maalalayan pa na makaahon sa kanilang

kinakasaldalakan.

Nagsimula ang asosasyon na may layuning bumuo ng negosyo at samahan. Nagkasundo-sundo ang bawat miyembro na grocery store ang pasuking negosyo dahil karamihan sa kanila ay may kaalaman sa pagpapatakbo ng isang tindahan. Ang bawat miyembro ng asosasyon na ito ay nababahaginan ng kita ng tindahan. Ang bawat kita naman na natatanggap ng miyembro ay nagsisilbing malaking tulong sa bawat pamilya upang magamit sa araw-araw na pangangailangan nang mga ito.

Sa pagsali sa asosasyon, ay lalong mas nagiging bukas ang bawat isa sa bagong kaalaman at karunungan. “Nung sumali po kami dito naturuan din po kami sa pagmamanage. Dati po kasi nung namamasukan ako, sa bahay lang. Ngayon po alam ko na magbudget, magmanage at pakikisama,” wika ni Domenia. “Natuto po kaming magbudget, makipag-usap at makisama sa iba’t ibang tao,” bahagi naman ni Nanay Iris Joy. Ang programa na ito ay hindi lamang naglalayong iangat ang estado sa pamumuhay ng mga miyembro ngunit pati na din ang pakikipagkapwa ng mga ito.

Sa kasalukuyan, itinatabi ng mga miyembro ng naturang SLPA ang kanilang kinikita sa pagbebenta ng bigas tuwing payout, na kanilang balak na ipambili ng van upang kanilang maging service sa pagdadala ng kanilang mga paninda mismo sa bahay ng kanilang mga customer. Ito ang isang istrategiyang naisip ng mga miyembro ng “Tindahang Bigay Pag-asa” upang maabot din ang mga kababayan nilang malalayo ang tirahan sa bayan. Kaya naman, masasabing ang kanilang grocery ay customer-oriented, kaya marami ang pinili pa rin ang bumili sa kanila, isa na rito si Nanay Dynalyn Tabangay, 42, isang Parent-Leader at ngayo’y Local Link na rin sa bayan ng Rizal.

“Bukod po sa mababait sila ay mura rin ang kanilang paninda, abot kaya, kaya naman mas pinipili ko pong bumili dito at hinikayat ko na rin po ang aking mga ibang ka-miyembro na sila na rin ang tangkilin, bilang tulong na rin namin,” bahagi ni Nanay Dynalyn. ### (Andyleen C. Feje)